

JUBILEJ ZENIČKE FIRME "A ELING"



Desetljeće kvalitetnog i prepoznatljivog rada i usluga

Sredinom novembra ove godine preduzeće "A Eling" d.o.o. Zenica obilježit će vrijedan jubilej, deset godina postojanja i uspješnog rada ovog preduzeća. Firma je počela sa elektro instalaterskim poslovima i u početku je imala svega dva radnika električara, te direktora Muhameda Tufekčića, koji je tada također vršio poslove električara. Danas, A Eling ima više od 50 uposlenih među kojima je desetak inženjera raznih profila, mašinstva, građevine, arhitekture i elektrotehnike.

Prvobitnu djelatnost elektroinstalacija, vremenom su proširili na oblast građevinske operative, a onda su uposlene u tom sektoru odlučili angažirati u stambenom servisu, odnosno u poslovima upravljanja i održavanja stambenih i stambeno-poslovnih prostora u Zenici.

Najveći upravitelj u ZDK

U odnosu na desetak ugovora u prvoj godini pružanja usluga upraviteljstva, danas A-Eling kao upravitelj ima potpisane ugovore sa oko 300 ulaza, odnosno oko 10 hiljada stambenih jedinica, što ih označava za najvećeg upravitelja na području ZDK.



A Eling ima impozantnu referencu listu sa značajnim brojem realiziranih projekata. Kad su u pitanju elektroinstalaterski radovi, od 2008. do 2013. pružali su usluge održavanja javne rasvjete u Zenici, za što su imali uposlenih 10-tak električara. Od 2012. imaju zaključen ugovor sa JP Ceste Federacije BiH za održavanje javne rasvjete u tunelima, na mostovima i raskrsnicima. Također, bili su angažirani na izgradnji i održavanju elektro instalacija na Trening centru na Crkvičkom brdu.

Kasnije su se kadrovski ojačali, primivši nekoliko inženjera i u djelatnost uvrstili i poslove zaštite na radu i zaštite od požara. U tom smislu, imaju profesionalni servis održavanja protupožarnih aparata i certificirane radnike na tim poslovima. U oblasti građevinarstva, u Sarajevu su angažirani na



Muhamed Tufekčić

izgradnji nekoliko resort naselja za arapske investitore.

Kvalitet kao imperativ

"Kad pogledam unazad, sa koliko neiskustva sam ustvari ušao u ovaj projekat i činjenicu da imamo konstantan rast u proteklih deset godina, ja sam i više nego zadovoljan sa onim u što je A Eling danas izrastao", kaže direktor Tufekčić, ističući da je glavni razlog koji je stalan rast i razvoj preduzeća insistiranje na kvalitetu usluga i ugrađenih materijala.

"Kao socijalno osjetljiva ali i tržišno orjentisana firma, nastojimo napraviti spoj između slabe platežne moći građana i kvaliteta izvedenih usluga i ugrađenih materijala. U tom smislu, mi nastojimo biti iznad prosjeka. Nekada se klijentima naše usluge u odnosu na konkurenciju možda učine skupe. Ali, kad se uvjere u kvalitet materijala i usluga potpišu ugovore sa nama i budu vjerni našem stambenom servisu", ističe Tufekčić.

Sa ciljem unaprjeđenja kvaliteta usluga, osoblje A Elinga periodično provodi ankete kod predsjednika kućnih savjeta da li su zadovoljni kvalitetom njihovih usluga i u skladu sa rezultatima anketa planiraju buduće poslovanje i razvoj firme. U tom smislu, samoinicijativno su uveli procedure koje se traže kod izdavanja ISO certifikata za standarde upravljanja kvalitetom. (E.B.)

OPĆINA ŽEPČE

Puštene u promet tri nove dionice puta

U Žepču su svečano puštene u promet tri dionice lokalnih puteva i to obnovljeni dio puta na potezu Lupoglav-Vinište, dionica puta u MZ Ciglane i potpuno nova dionica asfaltiranog puta u MZ Zenički put. Dionica puta Lupoglav-Vinište finansiran je sredstvima Svjetske banke za obnovu i razvoj, čija je vrijednost oko 250.000 KM. U MZ Ciglane sredstvima Općine Žepče i UNDP-a asfaltirana je dionica puta od 300 metara, čime je najavljen završetak započete dionice prema žepačkoj poslovnoj zoni "XP". Nova dionica asfaltiranog puta u



MZ Zenički put koštala je 70.000 KM a finansirana je zajedničkim sredstvima Kantonalnog ministarstva za rad, socijalnu politiku i izbjeglice, Federalnog ministarstva prostornog uređenja, te općine Žep-

če. Svečanosti su prisustvovali i puteve pustili u promet: načelnik općine Mato Zovko sa pomoćnicima, predsjedavajući Općinskog vijeća Muhamed Jusufović, predsjednici i mještani MZ-a. (R.Ag.)

SEDAM NOVIH UGOVORA O DODJELI OPĆINSKOG PODSTICAJA

Iznos podsticaja je do 3.000 KM po korisniku

U Kaknju je upriličeno potpisivanje pet ugovora o dodjeli općinskog podsticaja za proširenje zasada jagodičastog voća za one koji već imaju zasade jagodičastog voća u površini od minimalno jednog dunuma i dva ugovora o dodjeli općinskog podsticaja za proširenje farmi u oblasti stočarstva. Ugovore su potpisali načelnik Općine Kakanj Nermin Mandra i korisnici sredstava. Korisnici sredstava koja se dodjeljuju kao podsticaj za proširenje zasada jagodičastog voća su Samira Karahodžić, Nisvet Delić, Salih Vajzović, Habiba Musić i Lejla Zaimović. Iznos podsticaja je do



3.000 KM po korisniku, a u zavisnosti od površine na kojoj će proširiti zasade jagodičastog voća. Općina Kakanj sufinansira 90 posto od ukupne vrijednosti projekta, a krajnji korisnik 10 posto. Korisnici sredstava koja se dodjeljuju kao podsticaj za proširenje farmi u oblasti stočarstva su Ja-

goda Andrić i Anda Petrović. Iznos podsticaja po korisniku je 7.020 KM. Od tog iznosa korisnici obezbjeđuju 1.053 KM, a preostali dio Općina Kakanj. Sredstva su namijenjena za nabavku životinja, nabavku poljoprivredne mehanizacije i opreme, te adaptaciju štalskih objekata. (Az.S.)

POČETKOM NOVEMBRA U VISOKOM

Tradicionalni sajam "Jesen u Visokom"

Općina Visoko će i ove godine nastaviti sa organizovanjem tradicionalne manifestacije "Jesen u Visokom", koja ima za cilj predstavljanje domaćih proizvođača organske hrane, privrednika i zanatlija, a svi zainteresovani će

moći vidjeti bogatu ponudu poljoprivredno-prehrambenih proizvoda, kao i organske proizvodnje, što ovom sajmu daje poseban značaj u današnje vrijeme. Ovogodišnji Izložbeno-prodajni sajam poljoprivredno-prehrambenih proizvoda će se održati u KSC "Mladost" u Visokom i to 4. i 5. novembra ove godine.

"Pozivamo sve zainteresovane privrednike (pravna i fizička lica te udruženja), samostalne individualne proi-



zvođače poljoprivredno-prehrambenih proizvoda, koji se bave proizvodnjom hrane namijenjene tržištu, da svoje učeske na Sajmu prijave u Službu za finansije, privredu i lokalni ekonomski razvoj, a isto tako pozivamo se ljude iz našeg Ze-do kantona i šire da posjete visočki tradicionalni jesenski sajam i da se sami uvjere u kvalitet domaćih proizvoda", naveli su iz Općine Visoko. (N.K.)